

Ikalaata ku Bhaebulaniya Uwandilo

Ishitaabu ishi shitakumanyikha kuti wu naanu we asimbile, ileelo ya nalyoli kuti aamile Mukilisiti umulongozi we aamile nu waamulo mu vibhanza, mu khabhalilo khe uPaulo akhasimbaga amakalaata gaakwe ku vibhanza. Ikalaata ili lyasimbiilwe ku Bhayahuudi bhamu bhe bháamile Bhakilisiti, ileelo bhakhalingwaga kululekha ulwitikho lwabho kwa Yeesu.

Ikalaata ili likumulolesya uYeesu she ali ku Bhakilisiti bhonti. Akulolesya kuti uYeesu Mwana wa Mlungu, kabhili uweene mapiti kushila abhakhabhizya bhe aBhayahuudi bhakubhashindikha, mapiti kubhashila abhakuwi abha Lufingo ulwa Khali, kabhili mapiti kumushila nu Moose, we abhapiiye aBhayahuudi indajizyo zya Mlungu. Kabhili umusimbi akuti abhashilile abhapuutili abha Bhayahuudi, kunongwa ye atabhombile naalumo imbiibhi, awufumwizye uwuumi waakwe kubha mpumba iya kwefwa imbiibhi zya bhantu bhonti na ku khabhalilo khonti.

Kuwumalilishilo mwi kalaata ili, akupanga izya bhamaama bha Bhayahuudi, bhe utupango twabho tili mu Lufingo ulwa Khali, she bhakhamupuutaga uMlungu na kumusubhila. Pe shiniisho, akubhakumbusya aBhakilisiti kuti bhoope bhakwanziwa

kujendelela kumususubhila uMulungu, khabhili bhakambukhaje zye uYeesu akhabhombaga na kumanyizya.

Zye zili mu shitaabu ishi

Umusimbi akulolesya kuti uYeesu mupiti kubhashila abhak

UYeesu mupiti kubhashila abhapuutili bhe bhakhabhombaga

Kufwa kwa Yeesu kuleetile ulufingo ulupwa kushila lwe uM

Izya kubhagomwa aBhakilisiti, na kulonga izya bhantu abh

Insoshi ni ndamukho

uMulungu akulonga nitwe kushilila kwa Mwana waakwe

¹ Imaandi, uMulungu alonjile na bhamaama bhantu kushilila ku bhakuwi. Abhombile shini-ishi akhinji, na ku madala niigo niigo. ² Ileo insiku izi izya papiipi na kumpeleela, uMulungu alonjile nitwe kushilila kwa Mwana waakwe.* Amusabhuyeye wunuyoye uMwana agaale ivintu vwonti, khabhili kushilila kukwakwe uMulungu apelile kumwanya na paasi na vwonti vwe vili mumwo. ³ uMwana waakwe wunuyoye we akulama ku wumwamu wa Mulungu, kunongwa ye uweene shifwani sha Mulungu wuyoye. Ku makha gi zwi lyakwe akulindiilila ivintu vwonti. We abhazelufwa abhantu kwepa mu mbi-ibhi zyaabo, ayikhaaye inyoobhe iya kundiilo iya Mulungu apa lushindikho ulupiti nhaani kumwanya.

* **1:2** 1:2 uMwana waakwe Bhaazya uMwana wa Mulungu mu Wilulanyo uwa mazwi amajeni.

UYeesu mupiti kushila abhakhabhizya

4 ƳMũlungu ámubhiishile uMwana waakwe abhe mupiti kushila abhakhabhizya, anza she ámupiiye itaawa lye lipiti kushila amataawa gaabho. ⁵ Kunongwa ye uMũlungu atámubhuziizye ukhakhabhizya ngaweeka mu bhakhabhizya bhaakwe kuti,

“Iwe we Mwana waani,
 umusanyuunu nabha ne Taata waakho.”†
 Khabhili uMũlungu atálonjile amazwi ganaaga kwa khabhizya wowonti kuti,
 “Ine intibhe ne Taata waakwe,
 wope atibhe Mwana waani.”‡

6 Heelo uMũlungu we akumusonteelezya uMwana waakwe uwa kwanda kupaarwa mu nsi, átili,
 “Abhakhabhizya bhonti abha Mũlungu
 bhamupuutaje uweene.”§

7 Khabhili we akulonga ku zya bhakhabhizya, átili,
 “Akubhabhiikha abhakhabhizya bhaakwe
 kubha mupepu,
 bhoope abhabhombi bhaakwe
 akubhabhiikha
 kubha ngati mbiitu zya mwoto.”*

8 Heelo ku zya Mwana waakwe akuti,
 “We Mũlungu, uwamwene waakho†
 wutijendeelele wiila na wiila!

† **1:5** 1:5 Bhaazya Zabuuli 2:7. ‡ **1:5** 1:5 Bhaazya 2 Samweli 7:14. § **1:6** 1:6 Bhaazya Nkumbushizyo 32:43. * **1:7** 1:7 Bhaazya Zabuuli 104:4. † **1:8** 1:8 Uwamwene waakho Bhaazya uwamwene wa Mũlungu mu Wilulanyo uwa mazwi amajeni.

Iwe ukutabhaala mu wamwene waakho ku wugolosu.

⁹ Iwe uyiganile uwugolosu,
ileelo ukuwuviiitilwa uwubhiibhi.
Ye nongwa uMulungu, uMulungu waakho,
akupashile amafuta aga kukukhondezya
na kukubhiikha kubha we mupiti
kushila abhamwinyu bhonti.”[‡]

¹⁰ Khabhili uMulungu akumabhuzya uMwana
waakwe akuti,
“Iwe Mwene we wápelile insi kuwandilo,
khabhili we wápelile kumwanya ni nyoobhe
zyakho.

¹¹ Viniiwwo vwonti vikhayisila, vikhayilala anza
menda.
Ileelo iwe ukhayibha insiku zyonti.

¹² Iwe ukhayizivungaanya-vungaanya anzi
golole,
anzu mwenda zikhayilala.

Ileelo iwe utakugalunhana,
amanha gaakho gatakusila naalumo.”[§]

¹³ Bhali, khabhizya alikwi we uMulungu amub-
huziizye lumo kuti,
“Yiikhala kumbali iyi nyoobhe yaani iya
kundiilo,
paka we nabhabhiikha abhalugu bhaakho
paasi pa vinama vwakho”?^{*†}

[‡] **1:9** 1:8-9 Bhaazya Zabuuli 45:6-7. **§ 1:12** 1:10-12 Bhaazya Zabuuli 102:25-27. ^{*} **1:13** 1:13 Paka we nabhabhiikha abhalugu bhaakho paasi pa vinama vwakho kwe kuti kubhatola na kubhatabhaala abhalugu bhaakwe. [†] **1:13** 1:13 Bhaazya Zabuuli 110:1.

14 Pe shiniisho, abhakhabhizya bhe bhooni? Mpepu zye zikumubhombela uMulungu, wope akuzisonteelezya zibhabhombelaje bhaala bhe bhakhayiposheela uwuposhi.

2

Uwuposhi uwupiti uwa Mulungu

1 Pe shiniisho, tukwanziwa kujina kugalema gaala ge tugimvwinzye, gatahashe gatupulushe. 2 Intumi ziila zye abhakhabhizya bhábhapiiye abhamaama bhítu zyámile zya nalyoli. Pe shiniisho umuntu wowonti we atakhazilandataga awe atakhazitinikhaga, akhafundwaga anza she yikwanziwa. 3 Bhuli, itwe tungakhola bhuliibhuli kupona inga tutakwusaajila uwuposhi uwupiti anza wunuuwu? UMwene uYeesu wuuyo we átalile kwuwwinsya uwuposhi wunuuwu, na bhaala bhe bhámutejeleziize bhakutusimishizya kuti wanalyoli. 4 UMulungu wope áwusimishiziize uwuposhi wunuwu kwi dala ilya kubhapa abhantu amakha aga kubhomba ivilolesyo na mayele. Khabhili akhabhapanga ivikunjilwa iwwa Mupepu uMufinjile anza she áyiganile wuuyo.

UYeesu áamile muntu

5 UMulungu atábhahiishile abhakhabhizya kutabhaala insi ye yikwinza, kwe kuti insi ye tukalonga akhapango khaakwe. 6 Lyoli uWusimbe uWufinjile wakuti, “We Mulungu, umuntu wu naanu kuti umukwiniilile,

khabhili umuntu* wu naanu kuti
umusaajile?

7 Wámubhiishile umuntu abhe paasi

kushila abhakhabhizya

ku khabhalilo khashe.

Niiwe ukhaamupa uwumwamu nu lushindikho,

8 khabhili akhahhiikha ivintu vwonti

paasi pa waamulo waakwe.”†

Kwe kuti uMlungu akhamubhiikha umuntu kutabhaala ivintu vwonti sita kulekha naakhamu. Poope shiniisho, tutakulola kuti umuntu akuvitabhaala ivintu vwonti ku khabhalilo ikha. 9 Ileelo tukumulola uYeesu, we ku khabhalilo khashe abhishiilwe paasi kushila abhakhabhizya, inga ku wiila wa Mlungu afwe kunongwa ya bhantu bhonti. Wunuyoye we uMlungu amupiiye uwumwamu nu lushindikho ulupiti kunongwa iya kuyimba na kufwa.

10 Pe shiniisho, yakhondeeye kuti uMlungu we apelile ivintu vwonti, na kuvisunga, akhamubhiikha uYeesu kubha mukwilizu kwi dala iya kuyimba. Abhombile shiniisho inga uYeesu abhaleete abhaana abhinji kusangaanila uwumwamu waakwe. Kunongwa ye uYeesu we akubhalongola abhantu bhawaaje uwuposhi.

11 Uweene uYeesu we akubhazelufwa abhantu imbiibhi zyaabho, peeka na bhanaabho bhe akubhazelufwa, bhonti bhaana bha Taata weeka. Kunongwa yiniyo, uYeesu atakulola insoni kubhahilishila kuti bhanholo bhaakwe.

12 Uweene akuti,

* 2:6 2:6 Umuntu Mu ndongo iya Shiyunaani yikuti mwana wa Adamu. † 2:8 2:6-8 Bhaazya Zabuuuli 8:4-6.

“We Mulungu, intilumbiilile itaawa lyakho
 ku bhanholo bhaani,
 pakaasi pa lubhangaano lwabho
 intikwimbile inyimbo izyi mpaalo.”‡

13 Khabhili akuti, “Intibhiishe ulusuubhilo lwani
 kwa Mulungu.”§ Iwinza akuti, “Indi ipa peeka
 na bhaana bhe uMulungu ampiye.”*

14 Kunongwa ye bhanaabho abhaana,
 bhali nu mubhili ni bhanda, wopee uYeesu
 akhabha anza bheene, akhasangaanila uwuntu
 waabho. Abhombile shiniisho inga kwi dala
 ilya wufwe waakwe amuyazye uSeetani,
 we ali na makha aga kwazya abhantu kuti
 bhafwanje.

15 Khabhili uYeesu afuuye inga
 abhasatule bhonti bhe bháamile bhatumwa
 kunongwa ya kwogopa uwufwe mu wiikhalo
 waabho. 16 Liniilyo likulolesya apazelu kuti
 uYeesu atinzile kubhaavwa abhakhabhizya,
 lyoli ayinzile kubhaavwa abhantu abha shipaafi
 sha Abulahaamu.† 17 Pe shiniisho, ákhondeeye
 kukholanywa na bhanholo bhaakwe mu zyonti,
 inga abhe mupuutili umupiti‡ uwa shisa,
 khabhili musunde ku mbombo zya Mulungu.
 Kwi dala liniilyo, ákholile kufumwa imfinjile
 iya kwefwezya abhantu imbiibhi zyaabho.

18 Kunongwa ye uweene ayimbile we akulingwa,
 angakhola kubhaavwa bhe bhakulingwa.

‡ 2:12 2:12 Bhaazya Zabuuli 22:22. § 2:13 2:13 Bhaazya
 Yeesaya 8:17. * 2:13 2:13 Bhaazya Yeesaya 8:18. † 2:16
 2:16 UAbulahaamu Bhaazya mu Wilulanyo uwa mazwi amajeni.
 ‡ 2:17 2:17 Umupuutili umupiti Bhaazya abhapuutili mu Wilu-
 lanyo uwa mazwi amajeni.

3

UYeesu mupiti kushila uMoose

¹ Pe shiniisho, bhanholo bhaani mu lwitikho, mwe mubhilishiliilwe na Mlungu, musibhililaje ku zya Yeesu we musundikwa wa Mlungu, khabhili we mupuutili umupiti uwa lwitikho lwitu. ² Wunuyo amile musunde kubhomba zinyo zionti kwa Mlungu we amusabhuye, anzu Moose* she amile musunde kulongozya abantu bhonti abha mu nyumba ya Mlungu, kwe kuti aBhaisilaeli. ³ UYeesu akhondeeye ulushindikho lupiti kushila uMoose, kunongwa ye umuzenji uwi nyumba akuposheela ulushindikho nhaani kushila inyumba yinyo. ⁴ Kunongwa ye inyumba yoyonti yili nu muzenji waakwe, ilelo uMlungu we Muzenji Mupiti wa vintu vwonti.

⁵ uMoose amile mubhombi umusunde ku bhantu bhonti abha mu nyumba ya Mlungu, kwe kuti aBhaisilaeli, khabhili alonjile ku zila zye uMlungu akhayizilonga pilongolela. ⁶ Ilelo uKilisiti Musunde anzu Mwana we ali na waamulo mu nyumba ya Mlungu. Itwe taneetwe twe bhantu bha mu nyumba yaakwe, inga tukujendelela kubha twe bhadandamazu na kuyisinda mu lusubhilo lwe tukuyibaadila.

Insoshi ku zya kakaana kwitika

⁷ Ye nongwa uMupepu uMufinjile akulonga kuti,

* **3:2** 3:2 uMoose Bhaazya mu Wilulanyo uwa mazwi amajeni.

- “Umusanyuunu, inga mwimvwa izi lya
 Mulungu,
 8 mutakhabhe na mooyo amagomu
 anza bhamaama bhiinyu she bhámáile.
 Abheene bhákhaanile kulongolwa nu Mulungu,
 akhabhalilo khaala khe bhándinjile mu
 shilozu.
 9 Kunukwo abhamaama bhiinyu
 bhándinjile na kunjema,
 she poope ku manha amashumi gani
 bházilolile imbombo zyani.
 10 Kunongwa yiniyo, inhashiviitilwa ishipaafi
 shaabho,
 inhati, ‘Abhantu ibha bhapubhile mu mooyo
 gaabho,
 khabhili bhatagamanyile naalumo amadala
 gaani.’
 11 Pe shiniisho, inhalapa ku mulakha waani,
 inhati, ‘Nalyoli te bhakhinjile apa kutuzya
 paani.’ ”†
 12 Bhanholo bhaani mu lwitikho, mubhe
 amiiso, atakhabhe ngaweeka mukaasi yiinyu
 uwa mwoyo umubhiibhi we wutakwitikha,
 we wukuyisaabhula kwa Mulungu we
 mwumi. 13 fleelo weeka weeka amugomwaje
 uwamwabho isiku lyolyonti lye twati
 umusanyuunu,‡ inga umuntu wowonti mukaasi
 yiinyu atakhakhopelwe kugalushila mu
 mbiibhi, na kubha nu mwoyo umugomu.
 14 Kunongwa ye tukusanganila nu Kilisiti, inga

† 3:11 3:7-11 Bhaazy a Zabuu li 95:7-11. ‡ 3:13 3:13
 Umusanyuunu kwe kuti akhabhalilo khonti khe abhantu bhali
 na khabhalilo akha kumwitikha uMulungu.

tukudaaga kulemelela ulwitikho lwe tuli nalwo kufuma kuwandilo kufishila kuwumalilishilo.

¹⁵ UWusimbe uWufinjile wakulonga kuti,
 “Umusanyuuna, inga mwimvwa izi lya
 Mlungu,

matakhabhe na mooyo amagomu,

anza bhamaama bhiinyu she bháamile.”§

¹⁶ Bha bhanaanu bhe bhímvwizye izi lya Mlungu bhakhasambukha? Bha bhaala bhonti bhe bhálongoliilwe na Moose kusogola mu Miisili.

¹⁷ Khabhili bha bhanaanu bhe bhámuvisiizye uMlungu ku manha amashumi gani? Bha bhaala bhe bhábhombile imbiibhi, amavimba gaabho gakhasaata mu shilozu.

¹⁸ Bha bhanaanu bhe uMlungu álapile kuti te bhakhinjile apa kutuuzya paakwe? Bha bhaala bhe bhásiitile kumutinikha. ¹⁹ Pe shiniisho tumanyile kuti abhantu bhanaabho bhápotiilwe kwinjila panaapo kunongwa ye bhatítishile.

4

Kutuuzya abhantu bha Mlungu

¹ Pe shiniisho, kunongwa ye umulaji uwa kwinjila apa kutuuzya wuli she wuliipo, tubhe amiiso inga kutakhabhe nuumo mukaasi yinyu uwa kutolwa kwinjila panaapo. ² Kwe kuti iNtumi iNyinza zilumbiililwe kukwitu anza she zyálumbiililwe ku bhantu bhanaabho abhi maandi.

Ileelo intumi ziniizyo zitábhavwizye ngakheeka, kunongwa ye bházyimvwizye, ileelo bhatáziposheleeye ku lwitikho. ³ Pe itwe

§ 3:15 3:15 Bhaazyza Zabuuili 95:7-8.

twe tukumwitikha uMwungu tukhayinjila pa wiikhalo wunuwu uwa kutuzya we uMwungu alajile. Anza she alonjile kuti,
 “Inhalapa ku mukha waani,
 inhati, ‘Nalyoli te bhakhinjile apa kutuzya paani.’ ”*

uMwungu alonjile ziniizo she poope uwutuzyo wunuwu waliipo kufuma pe apelile insi. ⁴ Kunongwa ye mu Wusimbe uWufinjile paliipo pamu pe pasimbiilwe ku zyi siku ilya saba kuti, “Pi siku ilya saba uMwungu atuziize, akhatuzya kubhomba imbombo zyakwe zyonti.”† ⁵ Khabhili mu Wusimbe uWufinjile pamwanya ipo, uMwungu alonjile atili,
 “Nalyoli te bhakhinjile apa kutuzya paani.”‡

⁶ Abhamaama bhitu bhaala bhe bhamele bha kwanda kulumbiilwa intumi inyinza ziniizo, bhatakhinjila apa kutuzya paakwe, kunongwa ye bhakhaanile kwitika izwi lya Mwungu. ileelo umulaji waliipo ku bhanji kwinjila pa wiikhalo waakwe uwa kutuzya. ⁷ Pe shiniisho, uMwungu alibhiishile isiku ilyamwabho, akhalita kuti, “umusanyunu.” Akhalonga kushilila kwa mwene uDaudi pilongolela nhaani, ku mazwi ge gatalile kulongwa, atili,
 “Umusanyunu, inga mwimvwa izi lya Mwungu,
 matakhabhe na mooyo amagomu.”*

* **4:3** 4:3 Bhaazy Zabuuili 95:11. † **4:4** 4:4 Bhaazy Wandilo 2:2. ‡ **4:5** 4:5 Bhaazy Zabuuili 95:11. § **4:7** 4:7 UDaudi Bhaazy mu Wilulanyo uwa mazwi amajeni. * **4:7** 4:7 Bhaazy Zabuuili 95:7-8.

⁸ Inga uYoshua abhapanje abhantu bhanaabho uwutuuzyo, uMlungu nhani atálonjile pilongolela ku zyi siku ilyamwabho ilya kutuuzya.† ⁹ Pe shiniisho isiku ilya kutuuzya abhantu bha Mlungu lili she liliipo. ¹⁰ Umuntu wowonti we akwinjila apa kutuuzya, atituuzye kubhomba imbombo zyakwe anza she uMlungu atuziizye pi siku ilyi Sabaato‡ kubhomba imbombo zyakwe. ¹¹ Pe shiniisho, tuyikungulaje kwinjila panaapo apa wutuuzyo, inga atakhabhe ngaweeka wiitu we akhapootwe kupinjila, kunongwa iya kukhaana kutinikha, anza bhamaama bhitu she bhábhombile.

¹² Kunongwa ye izwi lya Mlungu lyumi, kabhili lili na makha, lili ngati mufwo umupiti we mwoji kwonti kwonti, likulasa mu mooyo nu mupepu, na kugabhanya impaaswa izya mubhili na mafuta ge gali mukaasi yaakwe. Kabhili lingakhola kumanya insiibho izya mu mooyo giitu. ¹³ Shitaliipo ishipelwa shoshonti she shifisishile pamiiso ga Mlungu. Ivintu vwonti vili apazelu pamiiso gaakwe, we kukwakwe takhayilaata imbombo zyitu pamiiso gaakwe.

UYeesu we mpuutili umupiti

¹⁴ Bhanholo bhaani, tuli nu mpuutili umupiti kushila bhonti, we abhalile kumwanya, wanuuyo wu Yeesu uMwana wa Mlungu. Pe

† **4:8** 4:8 UYoshua áamile mukuwi we álandatile pa Moose, woope ábhalongooye aBhaisilaeli kwinjila mu nsi ye bhálajilwe na Mlungu. Ayikhaaye amanha aminji palusalo we umwene uDaudi ashili kupaapwa. ‡ **4:10** 4:10 iSabaato Bhaazyu mu Wilulanyo uwa mazwi amajeni.

shiniisho, tuyikhamante nhaani mu lwitikho lwitu. ¹⁵ Kunongwa ye uMupuutili wiitu uMupiti awumanyile uwatolwe wiitu wonti. Woope bhulo alingiilwe ku madala niigo niigo nu Seetani anza taneetwe, ileelo uweene atabhombile imbiibhi. ¹⁶ Pe tulisejeelele sita lyoga itengo ilya wumwamu ilya Mulungu uwa wiila, inga tuposheelee ishisa nu wiila uwa kutwavwa akhabhalilo akha mayimba.

5

¹ Umupuutili umupiti wowonti akusaabhulwa mu bhantu, abhishiilwe kunongwa iya kumabhombela uMulungu kunongwa ya bhantu. Akumufumwizya uMulungu insupo ni mfinjile izya kulungulizya kunongwa iya kwefwa imbiibhi. ² Angakhola kubhalolela ishisa abhamwabho bhe bhatamanyile na bhe bhakateega kwi dala ilya kubhomba imbiibhi, kunongwa ye woope wuyo mutolwe. ³ Ye nongwa akwanziwa afumwe imfinjile kunongwa iyi mbiibhi zyakwe wuyo na kunongwa iyi mbiibhi zya bhantu. ⁴ Ataliipo umuntu we angakhola kuyibhiikha wuyo kubha mupuutili umupiti. Lyoli weeka weeka akusaabhulwa nu Mulungu kubha mupuutili umupiti anza she uAaloni* asabhuliilwe.

⁵ She shiniisho, uYeesu Kilisiti atayanziiye kubha mupuutili umupiti, lyoli uMulungu we amusabhuyeye na kumabhuyiza kuti, "Iwe we Mwana waani,

* 5:4 5:4 UAaloni amile mupuutili mupiti wa kwanda. Bhaazya Kufuma 28:1-3.

umusanyuunu nabha ne Taata waakho.”†
 6 Khabhili álonjile apamwabho mu Wusimbe uWufinjile kuti,
 “Iwe we mupuutili uwa wiila,
 ku shikholanyo sha Melikizeedeki.”‡§

7 UYeesu we ali mu nsi, ápuutile nhaani kwa Mulumu kwi zi ilya kudandizya, akhalila aman-sozi, kunongwa ye ámanyile kuti uMulumu ali na makha aga kumupokha mu wufwe. Wooke uMulumu ámutejeleziizye kunongwa ye áamile nu lutinikho kukwakwe, nu wutonsu. 8 Poope she áamile Mwana wa Mulumu, ámanyiye kutinikha kwi dala ilya mayimba ge gamwajile. 9-10 We amubhiikha kubha mugolosu kwi dala liniilyo, uMulumu ámupiiye uwupiti uwa mupuutili umupiti ku shikholanyo sha Melikizeedeki. Ipo pe akhaabhapa abhantu bhonti bhe bhakamwitikha uwuposhi uwa wiila na wiila.

Insoshi ku zya kululekha ulwitikho

11 Tuli na minji ga kulonga ku zya liniili ilya Yeesu kubha mupuutili umupiti, ileelo pagomu kugapanga, kunongwa ye mwe bhagomu

† 5:5 5:5 Bhaazyza Zabuuli 2:7. ‡ 5:6 5:6 Bhaazyza Wandilo 14:17-20; Zabuuli 110:4. § 5:6 5:6 UMelikizeedeki áamile mupuutili we akhamupuutaga uMulumu mu nhaaya iya mu Yelusaleemu akhabhalilo khe uAbulahaamu áamile mupuma.

Uweene áamile mupuutili wa Mulumu ku khabhalilo akhatali, we uMulumu ashili kumubhiikha uHaluuni, we ishikholo shaakwe sheene shábhishilwe kubha bhapuutili. UAbulahaamu akhamushindikhaga nhaani uMelikizeedeki kunongwa ye uwupuutili waakwe wáwushilile uwa Haluuni ni shikholo shaakwe.

kúzyaganya nalubhilo. ¹² Nalyoli ku khabhalilo ikha nhani mwe bhamanyizyi, ileelo mali she mukwanziwa umuntu uwa kubhamanyizya winza imanyizyo izya kuwandilo izyi zwi lya Mulungu. Muiiye kwonha izibha, te kulya ishaakulya ishikhome. ¹³ Kunongwa ye wowonti we akwonha izibha lyene, mwana mwela, atangakhola kúzyaganya imanyizyo izya wugulosu. ¹⁴ Ileelo ishaakulya ishikhome shikhondeeye ku bhantu abhasongo, bhe bhamanyiiye kuwaaganya uwuleganu uwi nyinza ni mbiibhi.

6

¹ Pe shiniisho tutasyalaje na ziniizyo imanyizyo zye twamanyiiye kuwandilo ku zya Kilisiti, lyoli tujendeelele kamanyila, inga tubhe twe bhalandati bhe bhagomile. Khabhili tutagalushilaje ulwalo ulwi manyizyo izya kulaata imbombo zye zikuleeta uwufwe na kumwitikha uMulungu. ² Khabhili tutagalushilaje imanyizyo ku zya kwozelwa, kubhiishilwa inyoobhe, kuzyakha abhafwe na kulongwa ukwa wiila na wiila. ³ Inga uMulungu ayigana, ziniizyo tutizibhombe.

⁴ Kunongwa ye utangakhola kubhagalusya winza abhantu bhaala kuti bhalaate bhe akhabhalilo khamu bhaposheleeye ulakhozyo, kupeelwa insupo iya kumwanya, na kusangaanila ishikunjilwa sha Mupepu uMufinjile, ⁵ khabhili bhálinjile uwinza uwi ntumi zya Mulungu na makha aga wumwene wa Mulungu mu nsi ye yikwinza, ⁶ ileelo

bhakhalekha kumwitikha uMulungu. Shiniisho ngati bhakumugoga uMwana wa Mulungu kwi dala ilya kumukhomeela pa shikhobhenhanyo akha wubhili na kumusupiza. Pe shiniisho abhantu bhanaabho utangakhola kubhagalasya kuti bhalaate winza.

⁷ Kunongwa ye ulusuuto lwe lukumwela aminzi agi mvula na kukuzya ivimela vwe vikuumupa uwukabhi umulimi, uMulungu akulusaya. ⁸ Heelo ulusuuto lwe lukukuzya amimvwa ni ndezya, lutakubha nu wukabhi, lyoli lukubha mu wuneneshezu uwa kugunwa nu Mulungu, kuwumalilishilo lukhayipembwa nu mwoto.

⁹ Bhaganwa bhaani, poope she imbasimbiye ku mazwi amakhali, indi nu lusimishizyo kuti mukubhomba inyinza zye zikulolesya kuti muposhiilwe. ¹⁰ Kunongwa ye uMulungu wa wugolosu, te aleshe kukumbakha imbombo zyinyu inyinza na she mulolesiizye ulugano lwinyu kukwakwe, kunongwa ya kwavwa abhafinjile* abhamwinyu kufuma kuwandilo paka ishi. ¹¹ Tusungushile nhaani kuti weeka weeka wiinyu ajendeelele kuyikungula shiniisho kufishila kuwumalilishilo, inga ziniizyo zye mukuzisubhila zikhakwile. ¹² Mutakhabhe mwe bhakhata, lyoli mwenyezyaje ku bhaala bhe ku lwitikho na kujimbiilila bhakuposheela ziila zye uMulungu alajile.

Umulaji wa Mulungu wa nalyoli

* **6:10** 6:10 Abhafinjile Bhaazya mu Wilulanyo uwa mazwi amajeni.

13 Imaandi, uMlungu we akuumupa uAbulahaamu umulaji, alapile kwi dala ilya kuyitekha wuuyo, kunongwa ye ataliipo we mupiti kumushila. 14 UMlungu alonjile atili, “Nalyoli intikusaye na bhe bhatipaapwe mu shipaafi shaakho bhinji.”† 15 Pe uAbulahaamu akhagaulila ku wujimbiilizu, kawamalilishilo uMlungu akhamubhombela gaala ge amulajile.

16 Abhantu we bhakulapa, bhakulapa kwa wuula we mupiti kushila abheene, kabhili ishlapo shikulolesya ziila zye zyalonjiilwe kuti zya nalyoli. Kubhomba shiniisho kukumala amadali. 17 UMlungu alapile inga atusimishizye itwe twe tukhayiposheela insayo zye alajiilwe umaama wiitu uAbulahaamu kuti isibhiililo lyakwe litangakhola kugalunhana. 18 UMlungu inga alajile na kulapa, atakugalulanya, kunongwa ye atakulonga ilenga. Uweene abhombile ganaaga gabhili inga itwe twe twushimbiliye uwutengaanu kukwakwe, tugome umwoyo kwi dala ilya kulemelela gaala ge uMlungu atulajile.

19 Ulusubhilo lwiitu lukugomwa na kulindiilila amooyo giitu anzi shijela ishimwamu she shikulemelezya imeeli. Ulusubhilo lunuulu lukwinjila aPafinjile Nhaani,‡ pe pali mukaasi mwi golole. 20 UYeesu atutanguliye kwinjila panaapo kunongwa yiitu. Wope we mupuutili umupiti uwa wiila ku shikholanyo sha Melikizeedeki.

† 6:14 6:13-14 Bhaazyu Wandilo 22:16-17. ‡ 6:19 6:19 APafinjile Nhaani Bhaazyu iNyumba iMfinjile mu Wilulanyo uwa mazwi amajeni.

7

UMelikizeedeki mupiti kushila abhapuutili abhanji

¹ Wunuwuyo uMelikizeedeki áamile wu mwene uwa mu nhaaya iya mu Saleemu, khabhili áamile mupuutili wa Mulungu uMupiti uwa kumwanya. Akhabhala kumuposheela uAbulahaamu we akugalukha kufuma ku wulugu uwa kulwa we abhatola abhamwene bhani, akhamusaya. ² Woope uAbulahaamu áfumwizye sheeka mwi shumi mu vintu vronti vwe áfwulile ku wulugu uwa kulwa akhaamupa uMelikizeedeki. Itaawa liniili Melikizeedeki, kwe kuti, “Umwene uwa Wugolosu.” Khabhili bhakuti wu mwene uwa Saleemu, kwe kuti, “Umwene uwa Wutengaanu.”* ³ Uyise nu nyina wa Melikizeedeki bhatakumanyikha, khabhili ataliipo we amanyile ishikholo shaakwe. Yitakumanyikha kupaapwa kwakwe awe kufwa kwakwe. Uweene mupuutili wiila, anzu Mwana wa Mulungu.

⁴ Yeenyi she uMelikizeedeki áamile mupiti! Poope nu Abulahaamu umaama wiitu umupiti, ámupiiye sheeka mwi shumi mu vintu vwe áfwulile ku wulugu. ⁵ Indajizyo zya Moose zikulonga zikuti, abhapuutili bhonti abha shikholo sha Laawi, bhakhanziwaaga kwega sheeka mwi shumi kufuma ku Bhaisilaeli abhamwabho. Bhákhondeeye kubhomba shiniisho poope she bháamile bhanholo bhaabho, kwe kuti abhantu abha shipaafi sha

* 7:2 7:1-2 Bhaazya Wandilo 14:17-20.

Abulahaamu. ⁶ fleelo wunuuoyo uMelikizeedeki atáamile shikholo sha Laawi, poope shiniisho áyeejile sheeka mwi shumi kufuma kwa Abulahaamu. Khabhili ámusayile uAbulahaamu we áamile nu mulaji kufuma kwa Mulumu. ⁷ Nalyoli tumanyile kuti umuntu we ali na makha aga kusaya mupiti kushila ula we akusaywa. ⁸ Khabhili abhapuutili bhe shipaafi sha Laawi na bhe bhakuposheela sheeka mwi shumi, bhantu bhe bhakufwa. fleelo uMelikizeedeki we áposheleeye sheeka mwi shumi kufuma kwa Abulahaamu, uweene akulongwa kuti ali she mwumi kufishila umusanyuunu. ⁹ Pe tungakhola kulonga kuti, poope nu Laawi wuuoyo, we ishapaafi shaakwe bhakuposheela sheeka mwi shumi, woope áfumwizye sheeka mwi shumi kwa Melikizeedeki kushilila kwa maama waakwe uAbulahaamu. ¹⁰ Kunongwa ye uLaawi áshili kupaapwa, pe shiniisho áamile she ali mu mubhili mwa Abulahaamu we uMelikizeedeki akhabhalaga kumuposheela.

UYeesu akholiine nu Melikizeedeki

¹¹ Indajizyo zya Moose zyáshiliye ku bhapuutili, kwe kuti abhantu abha shipaafi sha Laawi kwinda ku Bhaisilaeli. fleelo uwupuutili wunuuwo wutakhakwila. Pe shiniisho yákhondeeye kuti kubhe nu wupuutili uwamwabho ku shikholanyo sha Melikizeedeki we wutali anzu Aaloni. ¹² Khabhili uwupuutili inga wagalunhana, indajizyo zyope yikwanziwa zikalunhane. ¹³ Ishi ula we akulongwa ipa wu Yeesu, uweene atáamile muntu wa shikholo sha Laawi. Ataliipo umuntu uwa shikholo

shaakwe we ámubhombeeye uMulungu kwi dala ilya kumufumwizya imfinjile pa shigemo.

¹⁴ Kånongwa ye yimanyishile kuti uMwene wiitu uYeesu áfumiiye ishikholo sha Yuuda, nu Moose we akhalongaga ku zya bhapuutili, atáshiteshile ishikholo shiniisho.

¹⁵ Khabhili ganaaga ge tukulonga ishi gali apazelu nhaani, kånongwa ye afumiiye umupuutili uwamwabho anzu Melikizeedeki.

¹⁶ UYeesu atábhishiilwe kubha mupuutili kånongwa iyi ndajizyo izya bhantu kulandatana ni shikholo shaakwe, lyoli ábhishiilwe mupuutili kulandatana na makha aga wuumi waakwe we watali nu wumalilishilo.

¹⁷ Kånongwa ye uWusimbe uWufinjile wakuti, “Iwe we mupuutili uwa wiila,

ku shikholanyo sha Melikizeedeki.”†

¹⁸ Kwe kuti indajizyo iyi maandi yákhaniilwe kånongwa ye yitámile na makha, khabhili yitakhondeeye winza.

¹⁹ Kånongwa ye indajizyo zya Moose, zitákholile kukwilizya inongwa naazimo, ileelo ishi kuli ulusubhilo ulwinza nhaani, lwe lukutuleeta papiipi nu Mulungu.

²⁰ Kushila ziniizyo, we uMulungu akhabhabhiikhaga aBhalaawi kubha bhapuutili atálapile naakhamu kukwabho.

²¹ Ileelo we uMulungu akumubhiikha uYeesu kubha Mupuutili álapile átili,

“UMwene uMulungu alapile,

khabhili te agalulanye insiibho yaakwe ngakheeka,

† 7:17 7:17 Bhaazya Zabuuili 110:4.

'Iwe we mupuutili uwa wiila.' "‡

²² Pe kunongwa iya kulapilwa, uYeesu we mugombozi wa lufingo ulupwa, § Iwe lwinza nhaani kushila ulwi maandi.

²³ Uwuleganu uwamwabho ku kuti imaandi abhapuutili bháamile bhinji, kunongwa ye bhakhafwanga. Bhatáholile kujendeelela ni mbombo yaabho. ²⁴ Ileo uYeesu atibhe

mupuutili wiila kunongwa ye mwumi wiila na wiila. ²⁵ Pe shiniisho, uweene angakhola kubhapokha wiila abhantu bhonti bhe bhakwinza kwa Mulungu kushilila kukwakwe. Kunongwa ye uweene mwumi wiila na wiila, akubhapuutila akhabhalilo khonti kwa Mulungu.

²⁶ Kunongwa ye uYeesu we mupuutili umupiti we akhondeeye kukwitu, uweene mufinjile, atali nu wubhiibhi, awe sita wukhandamanu. Akhasaabhulwa ukutali na bhi mbiibhi, wope uMulungu akhamunyamvula kubhala kumwanya. ²⁷ UYeesu atakwanziwa

kufumwa imfinjile insiku zyonti anza she abhapuutili abhapiti abhi maandi bhakhabhombaga. Khabhili bhanaabho abhapuutili bhakhabhombaga shiniisho akhinji bhulo kunongwa iya kwefwa imbiibhi zyabho bhiiibho, na kwefwa imbiibhi zya bhantu. Ileo uweene afumwizye imfinjile kheeka kheene, we ayifumwizye wuuyo kufwa. ²⁸ Kunongwa ye indajizyo zya Moose zikusebha abhapuutili

‡ 7:21 7:21 Bhaazya Zabuuhi 110:4. § 7:22 7:22 Ulufingo ulupwa Bhaazya ulufingo mu Wilulanyo uwa mazwi amajeni.

abhapiti, abhantu bhe bhatolwe. Ieelo we khaashila akhabhalilo akhatali, uMulungu alapile we akumusebha uMwana waakwe kubha mupuutili umupiti we mugolosu wiila na wiila.

8

UYeesu mupuutili wiitu umupiti

¹ Mu ziniizyo zyonti zye takulonga, lye lipiti nhaani lye li liili: itwe tuli nu mupuutili umupiti we ali anza shiniisho, ayikhaaye inyoobhe iya kundiilo kwi tengu iya shimwene iya Mulungu, apa lushindikho ulupiti nhaani kumwanya.

² Kunukwo akumubhombela uMulungu aPafinjile, mukaasi mu sheegwi shiila isha nalyoli she shigombiilwe na Mwene uMulungu wuuyo, te ni nyoobhe zya muntu.

³ Umupuutili umupiti wowonti akusaabhulwa inga afumwe insupo ni mfinjile izya kulungulizya. She shiniisho, umupuutili wiitu umupiti woope yikhanziwaaga abhe na khantu akha kufumwa. ⁴ Inga uYeesu abhanje niishi akwikhala mu nsi umu, atamile abhe mupuutili ngakheeka, kunongwa ye kuli abhantu abhanji bhe bhakufumwa imfinjile kulandatana ni ndajizyo zya Moose. ⁵ Bhanaabho abhupuutili bhakumubhombela uMulungu aPafinjile pe shikholanyo, khabhili shinzyunguuli isha pafinjile kumwanya. Ye nongwa uMoose we ayilingaanya kuzenga isheegwi isha

kumupuuta uMwungu,* uMwungu ámusoshile akhamubhuzya akhati, “Usimishizye kuti ukugomba vwonti kulandatana ni nsiibho ye nákulanjile kwi gamba ilya Sinaayi.”† 6 Ileelo uYeesu apewiilwe imbombo ye nyinza nhaani kushila yiniyo iya bhapuutili abhi maandi. Imbombo yaakwe nyinza nhaani kunongwa ye uweene we mwimvwanyu uwa lufingo ulupwa lwe lwázenjiilwe pamwanya pa mlajji umwinza nhaani kushila uwi maandi.

7 Inga lunuulu ulufingo ulwa kwanda lutámile nu wubhiibhi wowonti, nhani kutali ni nsiibho iya lufingo ulwa wubhili. 8 Ileelo uMwungu akhaaga abhamaama bhiti bhali ni mbiibhi. Pe shiniisho, akhabhabhuzya akhati, “Yeenyi, akhabhalilo khakwinza,

khe inhayibhomba ulufingo ulupwa
na bhantu abha mu Isilaeli na bha mu
Yuda.

9 Lunuulu ulufingo ulupwa te lukhabhe
anza luula ulwi maandi
lwe nábhiishile na bhamaama bhaabho,
we nábhalemile inyoobhe kubhalongola
kwepa mu nsi iya mu Miisili.

Kunongwa ye bhataámile bhasunde
kulandata ulufingo lwani ulwi maandi.
Ye nongwa intáphasajiiye winza.

* 8:5 8:5 Isheegwi isha kumupuuta uMwungu ABhayahuudi we bhashiili kuzenga iNyumba iMfinjile bhágombile isheegwi mwe bhakhaputilaga, she bhakhatinji isheegwi isha wu-keeti. Shikhasimishizyaga kuti uMwungu ali peeka na bhantu bhaakwe. Bhaazya iNyumba iMfinjile mu Wilulanyo uwa mazwi amajeni. † 8:5 8:5 Bhaazya Kufuma 25:40.

- 10 Lunuulu lwe lufingo ulupwa
 lwe inhayibhomba na bhantu abha mu Isi-
 laeli
 insiku ziniizyo we zyafikha.
 Inhayibhiikha indajizyo zyani mu njeele zya
 bho, khabhili inhayizisimba mu mooyo gaabho.
 Niine inhayibha ne Mulumu waabho,
 bhoope bhakhayibha bhantu bhaani.
- 11 Te kukhabhe winza nu muntu
 uwa kumumanyiza uwamwabho,
 awe kumumanyiza unholo waakwe
 kumumanya uMwene uMulumu.
 Kunongwa ye weeka weeka,
 kwandila umunsi paka umusongo,
 bhakhayimanya ine.
- 12 Kunongwa ye inhayibhatuyila uwubhiibhi
 waabho,
 te in hazikumbushe winza imbiibhi
 zya bho.”[‡]
- 13 uMulumu we akulutekha lunuulu ulufingo
 kuti, “lupwa,” yikulolesya kuti alubhiishile
 ulufingo ulwa kwanda luula kubha lakulu.
 Akhantu khe khakulu khapalamiye kuteega.

9

Indajilo izya lufingo ulwa kwanda

- 1 Ishi ulufingo ulwa kwanda lwamile
 nu lubhaatikho lwakwe ulwa kumupuuta
 uMulumu, na pafinjile paakwe, mu nsi
 umu. ² Isheegwi isha kumupuuta uMulumu
 shagombiilwe, khabhili shamile ni mpitu

[‡] 8:12 8:8-12 Bhaazya Yelemya 31:31-34.

zibhili. Ulupitu ulwa kwanda mwámile ni shimbeeje isha kubhiishila ulukhozyo ni shintalati she shábhishiilwe amakaati pilongolela pa Mulungu. Ulupitu ulu itaawa lyakwe bhakhatinji aPafinjile. ³ Khabhili kwámile ni golole, lye lyápitulanyiinye ulupitu ulwa kwanda nū lwa wubhili. Ulupitu ulwa wubhili itaawa lyakwe bhakhatinji aPafinjile Nhaani. ⁴ Mukaasi mu lupitu lanuulwo ulwa wubhili mwámile ni shigemo ishi zahaabu isha kusuushizya uwuvumba, khabhili mwámile ni nsanduuka iya lufingo ye yágubishiliilwe ni zahaabu imbali zyonti. Mukaasi mu nsanduuka yiniyo, mwámile ni nsonta iyi zahaabu ye yámile ni maana* ni ndiisa iya Aaloni ye yámile na matundu ge gáduguuye. Khabhili mwámile ni vibeeza vibhili iwva mawe vwe vwásimbiilwe indajizyo ishumi izya lufingo. ⁵ Pamwanya pa nsanduuka yiniyo, páamile ni vifwani vibhili iwva bhakhahizya abha wumwamu, vwe vwámile na mapikho. Amapikho gaabho gágubishiiye ponti pe uMulungu akhabhombelaga kubhatuyila abhantu imbiibhi zyaabho. Heelo, ikha te khabhalilo akha kwilulanya ivintu vwonti mukaasi nhaani.†

⁶ Pe ivintu vwonti we vwabha vibhaatishe na kubhiikha kheeka kheeka pe pakwanziwa, abhapuutili bhakhinjalaga insiku zyonti mu

* **9:4** 9:4 Imaana shámile shaakulya she sháliwiilwe na Bhaishaeli we bhali mu shilozu. † **9:5** 9:5 Bhaazya Kufuma 25:18-22.

lupitu lunuwulwo ulwa kwanda na kubhomba imbombo yaabho iya kumupuuta uMulungu. ⁷ Heelo umupuutili umupiti wuuyo mwene we ayitishiliilwe kwinjila ulupitu ulwa wubhili, woope akhinjilaga kheeka kheene ku mwanha. Khabhili akhanziwaaga kwinjila ni bhanda kumufumwizya uMulungu imfinjile, kwefwa imbi-ibhi zyakwe wuuyo ni zya bhantu abhanji bhonti zye bhabhombile sita kumanya. ⁸ Kulandatana nu wutengulizu wunuwuwo, uMupepu uMufinjile akutulanga apazelu kuti shiniisho isheegwi ishi maandi we shamile she shimiliye, idala ilya kwinjilila aPafinjile Nhaani lyashili kwigulwa. ⁹ Shiniisho shikhholanyo shikhholanywa ni nsiku izi zye tuli nazyo, kunongwa ye ivintu ni mfinjile zye bhakufumwa bhe bhakupuuta zitangakhola kuzelufwa amooyo gaabho inga gabhe magolosu. ¹⁰ Kunongwa ye uwutengulizu wunuwuwo wakulonga ku zya vwakulya ni vwakumwela, na kuyizelufwa umubhili weene, ni mbombo izya wutengulizu ziniizyo zikhayisila we uMulungu agalulanya zyonti kubha mpwa.

UYeesu we mfinjile ye yitali nu wubhiibhi naawumo

¹¹ Pe uKilisiti ayinzile ali ngati mupuutili umupiti uwi nyinza zyonti zye zyzinzile. Akhinjila mu sheegwi ishamwabho she shinza, khabhili shikwilizu kushila isha kwanda. Isheegwi shiniisho shitagombiilwe nu muntu, kwe kuti te sha mu nsi yiniini ye yapeliilwe. ¹² Uweene ayinjiiye panaapo aPafinjile Nhaani kheeka kheene. Atapimbile

ibhanda ilyi mbuzi ni lyi ngwata, lyoli áyeejile ibhanda lyakwe wuúyo. Kwi dala liniilyo akhaatupa uwutúulwe úwa wiila na wiila. ¹³ Kúlandatana nu lufingo ulwa kwanda, ibhanda lyi mbuzi ni lyi nhambaku ni lota ilyi ngwata bhakhitililwaga abhakhandamanu, inga amabhili gaabho gazelupe. ¹⁴ Ileelo ibhanda lya Kilisiti lili na makha amapiti nhaani! Likuzelufwa amooyo giitu inga tutajendeelele kubhomba ziila zye zikuleeta uwufwe, lyoli tumabhombelaje uMukungu we mwumi. Ku makha ga Mupepu waakwe úwa wiila na wiila, uKilisiti áyifumwizye kwa Mukungu ngati mfinjile ye yitali nu wubhiibhi naawumo.

¹⁵ Kunongwa yiniyo, uYeesu we mwimvwanyi úwa lufingo ulupwa inga bhaala bhe bhabhilishiliilwe bhaposheele uwuumi úwa wiila na wiila we wálajilwe nu Mukungu. Kunongwa ye uYeesu áfuuye inga abhatúle kufuma mu mbiibhi zyahho zye bhábhombile akhabhalilo akha lufingo ulwa kwanda.

¹⁶ Kunongwa ye indajilo izya wugaali zikwitishilwa inga uwufwe wa wúla we abhiishile indajilo ziniizo wusimishizye kuti afuuye nalyoli. ¹⁷ Indajilo izya wugaali zikabhombekha inga we ábhiishile indajilo afuuye, ileelo zitakabhombekha inga ula we ábhiishile mwumi. ¹⁸ Ye nongwa poope ulufingo ulwa kwanda lutábhombeshile sita kwitikha ibhanda. ¹⁹ UMoose we aamala kubhabhaazizya aBhaisilaeli indajizyo zyonti izya Mukungu, áyeejile ibhanda lyi ngwata ni lyi mbuzi, peka

na minzi, amasepe amashamamu, nu lupaaaswa ulwi kwi lye bhakuti umuhiisopo. Pe akhitiilizya pamwanya pa shitaabu ishi Ndajizyo zya Mulungu peeka na ku bhantu bhonti, ²⁰ akhati, "Liniilyo libhanda lye likusimishizya ulufingo lwe uMulungu alajiziizye kuti mulandataje."‡
²¹ She shiniisho, uMoose ayitilizizye ibhanda pamwanya pa sheegwi na pamwanya pa viliilo ivwa lupuuto. ²² Kunongwa ye kulandatana ni ndajizyo, ibhanda lye bhakhazelufwizyaga akhantu khokhonti, na sita kwitikha ibhanda imbiibhi zitangatuyilwa.

UYeesu ayifumwizye kheeka kheene kwefwa imbiibhi

²³ Isheegwi isha mu nsi umu ni vintu vwakwe vve vikhahombelwaga kufumwizya imfinjile, shikholanyo sha viila ivwa kumwanya. Vinivwo bhakhavizelufwaga ni bhanda ilya vikhanu. Ileelo ivintu nyeene ivwa kumwanya, yikwanziwa kuvizelufwa ni mfinjile inyinza nhaani kushila ibhanda liniilyo ilya vikhanu.
²⁴ Kunongwa ye uYeesu Kilisiti atinjiiye apafinjile pe pagombiilwe na bhantu, pe shikholanyo bhulo isha Pafinjile apa kumwanya. Lyoli ayinjiiye kumwanya kuukwo, kwe akhabhalilo ikha ali pilongolela pa Mulungu kunongwa yitu. ²⁵ Umupuutili umupiti akhinjilaga aPafinjile Nhaani kheeka ku mwanha kumo ali ni bhanda ilya vikhanu, ileelo uYeesu Kilisiti atinjiiye kumwanya inga ayifumwe akhinji, uweene ayifumwizye kubha mfinjile kheeka

‡ 9:20 9:20 Bhaazya Kufuma 24:8.

kheene. ²⁶ Inga uYeesu abhanje anzu mupuutili umupiti wunuyo, nhani ayimbile akhinji kufuma kupelwa insi. Heelo she zitali! Ayinzile kheeka kheene insiku izi izya kumpeleela, inga atwefwezye imbiibhi zyitu kwi dala ilya kuyifumwa wuyo kubha mfinjile. ²⁷ Anza she abhantu bhonti bhabhishiilwe kufwa kheeka kheene, pilongolela we bhaafwa bhakulongwa, ²⁸ she shiniisho, uYeesu Kilisiti ayifumwizye kubha mfinjile kheeka kheene inga ayeefwe imbiibhi zya bhantu abhinji. We akwinza akha wubhili, te akhinze kwefwa imbiibhi, lyoli kubhapokha bhaala bhe bhakumugulila ku shisaago.

10

UYeesu we mfinjile iya wiila

¹ Indajizyo zya Moose shikholanyo shi nongwa inyinza zye zikwinza, ileelo te zye nongwa inyinza ziizyo. Imfinjile ziila zye bhakufumwa ku mwanha, zitangakhola kubhapa uwugulosu abhantu bhe bhakumupuuta uMulongu. ² Inga abhantu bhanaabho bhe bhakumupuuta uMulongu bhanje bhazelufwe imbiibhi zya bho nalyoli, bhangayimvwa kuti bhali ni mbiibhi winza, ni mfinjile ziniizyo nhani zikhasila. ³ Heelo imfinjile ziniizyo zikhabhombekhaga kubhakumbusya abhantu imbiibhi zya bho umwanha wowonti. ⁴ Kunongwa ye ibhanda lyi nhambaku ni lyi mbuzi litangakhola kwefwa imbiibhi.

5 Pe shiniisho, uKilisiti we ayinza mu nsi, alonjile nu Mulumu atili,

“Utakhanzaga imfinjile izya kulungulizya ni mfinjile izya vikholo ivwamwabho zye zikhanziwaaga ni ndajizyo, lyoli wandinganizanyiine umubhili.

6 Imfinjile izya kulungulizya ni zya kubhefwezya abhantu imbiibhi zitakhakukhondezyaga.

7 Pe inhati, ‘Indiipo ipa, we Mulumu, injilinganyiine kubhomba ishigane shaakho, anza she insembiliilwe mu Wusimbe uWufinjile.’ ”*

8 Kuwandilo uKilisiti akhati, “Utakhanzaga imfinjile izya kulungulizya ni zya vikholo ivwamwabho zye zikhanziwaaga ni ndajizyo, kabhili imfinjile izya kulungulizya ni zya kubhefwezya abhantu imbiibhi.” Wunuyoyo alonjile shiniisho, she poope imfinjile ziniizyo bhakhazifumwaga kulandatana ni ndajizyo zya Moose. 9 Pe akhati, “Indiipo ipa, we Mwene, injilinganyiine kubhomba ishigane shaakho.” Pe shiniisho, uMulumu akheefwa imfinjile ziniizyo izya kwanda, ileelo akhabhikha imfinjile ya Yeesu. 10 Kunongwa ye uYeesu Kilisiti abhombile ishigane sha Mulumu, itwe tukhazelupa kushilila imfinjile yiniizyo, awufumwizye umubhili waakwe kheeka kheene, yikhakwila.

* **10:7** 10:5-7 Bhaazya Zabuuli 40:6-8.

11 Kalandatana nu lufingo ulwa kwanda, umupuutili wowonti, insiku zyonti, akubhomba imbombo yaakwe na kufumwa imfinjile ziziila izya kulungulizya zye zitangakhola kwefwa imbiibhi. 12 Heelo uKilisiti ayifumwizye kubha mfinjile kheeka kunongwa yi mbiibhi, imfinjile ye yikhakwila akhabhalilo khonti. Pe akhabhala kwikhala ku nyoobhe iya kundiilo iya Mulungu, apa lushindikho nhaani. 13 Kufuma akhabhalilo khanaakho kufikha akhabhalilo ikha, akugulila paka uMulungu abhabhiishe abhalugu bhaakwe paasi pa vinama vwakwe. 14 Kunongwa ye ku mfinjile yaakwe yiniyo yeeka ye afumwizye, uYeesu abhabhiishile abhantu bhaakwe kubha bhakwilizu wiila.

15 Wope uMupepu uMufinjile akutushimishiza kuti inongwa ziniizi zya nalyoli. Kuwandilo akuti,

16 “UMwene uMulungu akuti,

‘Lunuulu lwe lufingo ulupwa,

lwe inhayibhomba na bhantu abha mu Isilaeli

insiku ziniizyo we zyafigha.

Inhayibhiikha indajizyo zyani mu mooyo gaabho,

kabhili inhayizisimba mu njeele zyaabho.’ ”

17 Kabhili akuti,

“Te inhazikumbushe winza imbiibhi zyaabho,

awe imbombo zyaabho imbiibhi.”†

18 Pe we imbiibhi zyatuyilwa, te kukhabhe winza kufumwa imfinjile iya kwefwa imbiibhi.

† 10:17 10:16-17 Bhaazya Yelemiya 31:33-34.

Kujimbiilila kuli ni nsayo inyinza

¹⁹ Bhanholo bhaani mu lwitikho, inkubhabhuzya kuti, kunongwa iyi bhanda lya Yeesu, itwe tungakhola kwinjila aPafinjile Nhaani sita lyoga. ²⁰ Uweene atwiguliye idala ipwa ilya wuumi, kushilila igolole liniilyo, kwe kuti kwi dala ilya kufwa kwakwe. ²¹ Pe shiniisho, kunongwa ye tuli nu mupuutili umupiti we akulongozya abhantu bha Mulungu, ²² tumusejelejaje uMulungu nu mwoyo umugolosu nu lwitikho ulusimishizu. Kunongwa ye amooyo giitu gitiliilwe ibhanda lya Yeesu inga galeshe insibho imbiibhi, na mabhili giitu mazelufwe ku minzi amasengamu. ²³ Pe tulemaje akhinza ulusubhilo lunuulwo lwe tukulwitikha, kunongwa ye uweene we abhiishile umulaji musunde. ²⁴ Khabhili tukwanziwa kusungana na kujinjizanya inga tuganane na kubhombelana inyinza. ²⁵ Tutalekhaje imwata yiitu iya kukhomaana peeka anza she abhanji bhaleshile kukhomaana. Lyoli tupelanaje amakha tuneetwe na tuneetwe kunongwa ye tukulola kuti isiku ilya Mwene uYeesu kugalukha likusejeelela.

²⁶ Inga tukujendeelela kubhomba imbiibhi she tuweenyi, kumo tuwumanyile uwanalyoli, yitaliipo imfinjile iyamwabho ye yingakhola kwefwa imbiibhi. ²⁷ Heelo khe khakusyala ku kugulila ku lyoga uwulonji wa Mulungu nu mwoto uwa kwogofwa we wukhayiyazya abhantu bhonti bhe bhakumukhaana uMulungu. ²⁸ Umuntu wowonti we akhaanile kulandata indajizyo zya Moose, akhagogwaga sita shisa

inga páamile nu wukeeti úwa bhantu bhabhili awe bhatatu. ²⁹ fleelo kwini ka zya muntu we akumusupizya uMwana wa Mulungu, khabhili akushoolanya ibhanda ilya lufingo lwa Mulungu lye limuzelufwizye, amulijile uMupepu uMufinjile úwa shisa. Bheli, umuntu wunúyo akhondeeye ulufundo ulapiti lwe luli bheli? ³⁰ Kunongwa ye tumanyile uMulungu we átili, “Kulanduzya mbombo yaani, ine inhayilanduzya.” Khabhili uWusimbe uWufinjile wakuti, “UMwene uMulungu akhayibhalonga abantu bhaakwe.”[‡] ³¹ Nalyoli yikwogofwa nhaani kulendela mu nyoothe zya Mulungu we mwumi.

³² Kumbushi insiku ziila izya kuwandilo we mwaziposheela iNtumi iNyinza. She poope insiku ziila mwáyimbile nhaani, ileelo imwe mwájimbiliye. ³³ Akhabhalilo khamu mukhayimbaga na kuligwa pilongolela pa bhantu abhinji. Akhabhalilo khamu mukhabhasajilaga na kubhaavwa bhaala bhe bhakhayimbaga anza shiniisho. ³⁴ Mwáhaloleeye ishisa abhamwinyu bhe bhákunguilwe mwi jeela. Khabhili mukhitiikha ku luseshelo kufwulilwa ishuma shiinyu. Kunongwa ye mwámanyile mu mooyo giinyu kuti muli ni vintu ivwinza nhaani vve vikudila willa.

³⁵ Pe madaagaje kumwitikha uYeesu sita kusingaana, kwi dala liniilyo mukhayiposheela insupo impiti. ³⁶ Kunongwa ye mukwanziwa

‡ **10:30** 10:30 Bhaazya Nkumbushizyo 32:35-36.

mubhe mwe bhajimbiilizu inga mukwilizye ishigane sha Mulungu, niimwe mukhayiposheela khaala khe alajile. ³⁷ Kunongwa ye uWusimbe uWufinjile wakuti,

“Khasyalile akhabhalilo khashe bhulo,
wunuyo we akwinza atiyinze, te akhaabhe.

³⁸ Khabhili umuntu umugulosu
atiposheele uwuumi ku lwitikho.

Ileelo inga akuyunjila, te inhondezwe nawo.”§

³⁹ Itwe tutaliipo mu bhanaabho bhe bhakuyunjila na kuteega, lyoli itwe tuli peeka mu bhaala bhe bhakumwitikha uMulungu na kuposheela uwuposhi.

11

Abhamaama bhitu she bhámwitishile uMulungu

¹ Ulwitikho ku kubha nu lusimishizyo ku zyi nongwa zye tukuzisubhila, ku kwitikha uw-analyoli uwi nongwa zye zitakulolekha. ² Ku lwitikho lwabho, uMulungu abhapaalile abhamaama bhitu. ³ Ku lwitikho, tumanyile kuti insi yápelilwe nu Mulungu kwi dala ilya kulonga izwi. Pe shiniisho, viila vve vikulolekha vwápelilwe kufuma mu viila vve vitakulolekha.

⁴ Ku lwitikho, uAbeli amufumwiziizye uMulungu imfinjile inyinza kushila iya musongo waakwe uKaayini. Khabhili kunongwa iya lwitikho lwakwe akhabhaaziwa nu Mulungu kuti mugulosu, uMulungu áziposheleeye imfinjile zyakwe. She poepe afuuye, ileelo

§ 10:38 10:37-38 Bhaazyá Habakuuki 2:3-4.

ulwitikho lwakwe shikholanyo kukwitu nu musanyuunu.*

5 Ku lwitikho, uEnoki akhanyamvulwa kubhala kumwanya sita kufwa, wope atakhalolekha winza kunongwa ye akhanyamvulwa nu Mulungu. Kunongwa ye uWusimbe uWufinjile wukusimishiza kuti palusalo uEnoki we ashili kunyamvulwa akhamukhondezyaga uMulungu.† 6 Pe shiniisho, tutangakhola kumukhondezya uMulungu sita kumwitikha. Umuntu wowonti we akwinza kwa Mulungu yikwanziwa ayitithe kuti aliipo, kabhili ayitithe kuti akubhapa insupo abhantu bhe bhakumwanza ku mwoyo wonti.

7 Ku lwitikho, uNoowa amutinishile uMulungu we amusokha ku zyi nongwa zye zyashiili kufumila. Pe akhazenga isafina inga uMulungu abhaposhe uweene peeka na bhantu abha mu nyumba yaakwe, na kubhalonga abhantu abha mu nsi bhe bhatamwitishile. Kunongwa yiniyo, uMulungu akhamubhaazya uNoowa kuti mugolosu pamiiso gaakwe.‡

Ulwitikho lwa Abulahaamu

8 Ku lwitikho, uAbulahaamu amutinishile uMulungu we akubhilishilwa abhale ku nsi ye uMulungu amulajile kuti akhayimupa yibhe yaakwe. UAbulahaamu akhasaama she poepe atamanyile kwe akubhala.§ 9 Ku lwitikho, akhikhala mu nsi ye alajuilwe nu Mulungu.

* 11:4 11:4 Bhaazya Wandilo 4:2-5. † 11:5 11:5 Bhaazya Wandilo 5:24. ‡ 11:7 11:7 Bhaazya Wandilo 6:13-22. § 11:8 11:8 Bhaazya Wandilo 12:1-5.

Akhiikhala mu sheegwi anzu Isaaka nū Yaakobo, bhoope bháposheleeye umulaji wuwuula we uAbulahaamu álajiilwe. ¹⁰ UAbulahaamu ábhombile shiniisho kunongwa ye akhagulilaga inhaaya impiti ye yili ni nyaalo zye zikudiila wiila na wiila. Yiniyo nhaaya imbaatishe na kuzengwa nū Mulungu wūyo.

¹¹ Ku lwitikho, uSaala* áyitishile kuti uMulungu akukwilizya zye alajile. USaala akhasaywa kubha pa wumwamu she poope áshiziizye amanha aga kubha nū mwana, khabhili áamile mulūji. ¹² Pe kufuma kwa Abulahaamu we áamile mugoosi atáamile angakhola kupaapa umwana, ileelo kwáfumiye abhantu abhinji nhaani anzi nzota izya kumwanya nū muselesenga uwa mumbali mwa sumbi vwe utangabhaazya.†

¹³ Abhantu ibha bhonti bháfuuye kumo we bhítishile. Bháshili kuposheela gaala ge bhálajiilwe, ileelo bházilolile ukutali, zikhabhakhondezya. Bhoope bhítishile kuti mu nsi umu bháamile bhajeni na bhe bhakushuula, ¹⁴ kunongwa ye abhantu bhe bhakwitikha shiniisho bhakulolesya apazelu kuti bhakwanza insi iyinji ye bhatibhe bhakhaaya. ¹⁵ Inga bhasiibhaje ku zyi nsi yaabho iyi maandi kwe bháfumiye, nhani bhákhilile kugalukha kuukwo. ¹⁶ Ileelo bhanaabho bhakwanza insi inyinza nhaani, kwe kuti kumwanya. Ye nongwa uMulungu atakulola insoni inga

* **11:11** 11:11 USaala áamile mushi wa Abulahaamu. † **11:12** 11:12 Bhaazya Wandilo 22:17; 32:12.

bhanaabho bhakumutekha kuti Mulungu waabho, kunongwa ye abhalinganizanyiine inhaaya kumwanya.

¹⁷ Ku lwitikho, uAbulahaamu ayilinganyiine kumufumwa uIsaaka kubha mfinjile, we ulwitikho lwakwe lukulingwa nu Mulungu. Uweene we aposheleeye umulaji wa Mulungu, ayitishile kumufumwa umwana waakwe weeka mwene,‡ ¹⁸ she poope uMulungu amubhuziize kuti, “Ishipaafi shaakho shikhayifuma kwa Isaaka.”§ ¹⁹ UAbulahaamu amanyile kuti uMulungu angakhola kuzuyisa abhafwe. Kwi dala limo, nalyoli uAbulahaamu amwajile winza umwana waakwe we amile ngati afuuye akhabha mupuma winza.

²⁰ Ku lwitikho, uIsaaka abhasayile abhaana bhaakwe, uYaakobo nu Esau ku zyi nongwa zye zikhayifumila pilongolela.*

²¹ Ku lwitikho, uYaakobo we apalamila kufwa, abhasayile abhaana bhonti bhabhili abha Yoosefu, na kumupuuta uMulungu kumo ayigamiiye ma ndiisa yaakwe.

²² Ku lwitikho, uYoosefu we apalamila kufwa, alonjile ku zya Bhaisilaeli she bhakhayifuma ku Miisili, khabhili akhalajizya ku zya kusyila amafupa gaakwe pilongolela.†

Ulwitikho lwa Moose

‡ **11:17** 11:17 Bhaazyu Wandilo 22:1-19. § **11:18** 11:18 Bhaazyu Wandilo 21:12. * **11:20** 11:20 Bhaazyu Wandilo 27:27-29, 39-40.

† **11:22** 11:22 Bhaazyu Wandilo 50:24-25; Kufuma 13:19.

23 Ku lwitikho, abhapaafi bha Moose bhámufisile uMoose ameezi gatatu kufuma pe apapiilwe. Bhámulolile kuti mwana mwinza, poope bhatógopile kukhaana indajizyo ye uFalao áfumwizye.‡

24 Ku lwitikho, uMoose we abha musongo, akhakhaana kubha mwana wa mwali wa Falao. 25 Uweene akhalola kwashi kusebha kuyimba peeka na bhantu bha Mulungu kushila kuseshela mu mbiibhi ku khabhalilo khashe. 26 Amanyile kuti kuyimba kunongwa iya Kilisiti kali nu wukabhi uwupiti nhaani, kushila uwudumbwe wonti uwa mu nsi iya mu Miisili, kunongwa ye akhasubhilaga kuposheela insupo ku nsiku izya mwilongolela.

27 Ku lwitikho, uMoose akhasogola mu Miisili sita kwogopa umulakha wa mwene. Ajimbiliye, amile ngati muntu we akhamulolaga uMulungu, we atakulekha. 28 Ku lwitikho, abhombile ishikulukulu ishi Pasaaka, akhalajizya aBhaisilaeli bhapashe ibhanda mu vimbalinga iwa malyango gaabho, inga wunuyoyo ukhabhizya uwa kuyazya atakhabhagoje abhakhatoote bhaabho.§ 29 Ku lwitikho, aBhaisilaeli bhonti bháfumiliye usumbi uwa Shaamu ni vinama anza she abhantu bhakujenda mu nsi inyuumu. Hleelo aBhamiisili we bhalinjizya kufumiila,

‡ 11:23 11:23 Indajizyo ye uFalao áfumwizye uFalao, kwe kuti umwene uwa ku Miisili, alajiziye abhaana abhasakhaala bhonti abha Shiebulaniya bhagogwe. Bhaazya Kufuma 1:22-2:2.

§ 11:28 11:28 Bhaazya Kufuma 12:7-13, 21-30.

bhakhawibha mu minzi.*

Ulwitikho ulwa bhantu abhanji kwa Mulungu

³⁰ Ku lwitikho, aBhaisilaeli bházyungulúye imbumba izyi nhaaya iya mu Yeeliko insiku saba, zikhagwa.† ³¹ Ku lwitikho, uLakhabho we áamile mulondo, atakhagoga peeka na bhantu bhe bhatakhamutinikhaga uMulungu, kunongwa ye ábhaposheleeye abhapiminhanyi abha Isilaeli ku wutengaanu.‡

³² Pe indonje lyoni winza? Akhabhalilo khatakukwila, kuti indonje ku zya lwitikho lwa Gidioni, uBalaaka, uSamusoni, uYeefuta, uDaudi, uSamweli na bhakuwi abhanji. ³³ Ku lwitikho, abhantu ibha bháluuye na bhamwene abhanji bhakhabhatola, bhátabhalaaye ku wugolosu, na kuposheela umulaji we uMulungu alajile. Kabhili bhádindile amalomu gi nsama, ³⁴ bhakhazimanya imbiitu izya mwoto, kabhili bhakhapulukha kugogwa nu mufwo umupiti. Bháamile bhatolwe, ileelo bhakhapeelwa amakha aga kutola ibho na kubhinga abhasikaali kufuma mu nsi izinji. ³⁵ Abhantanda abhanji bhakhabhaposheela abhafwe bhaabho bhe bhábhazyusiize. Kabhili abhantu abhanji bhálolile kwashi bhayimbe na kufwa, kushila kubha mu wusatulwe na kumabhombela imbiibhi uMulungu. Bhábhombile shiniisho inga bhakhazyushe bhabhe nu wiikhalo uwinza nhaani. ³⁶ Bhamu bhábhhasupiziize

* **11:29** 11:29 Bhaazyá Kufuma 14:21-31. † **11:30** 11:30 Bhaazyá Yoshua 6:12-21. ‡ **11:31** 11:31 Bhaazyá Yoshua 2:1-21; 6:22-25.

na kũkhomwa. Bhamu bhápinyiilwe na manyoloolo na kũkungwa mwi jeela. ³⁷ Khabhili bhamu bhákhomiilwe na mawe, bhamu bhabholiilwe na matuupa, bhamu bhágogiilwe nũ mufwo umupiti. Bhamu bháamile bhapiina, bhakhakwataga amagwembe agi ngoole na gi mbuzi, kũnongwa ye bhatáamile na khantũ naakhamu. Bhoope bháyimbile na kũbhombwa imbiibhi nhaani. ³⁸ Bhéleleeye mu shilozu na mũ magamba, bhakhikhalaga mũ ngwenya na mu miina. Abhantũ ibha bháamile bhinza, poope ni nsi yitákhondeeye kwikhala na bhantũ anza bhanaabho.

³⁹ Abhantũ bhanaabho bhonti bhe tũkũlonga inongwa zyaabho, bhápaliilwe kũnongwa iya lwitikho lwabho, ileelo atáliipo we áposheleeye ziniizyo zye álajiilwe nũ Mũlungũ. ⁴⁰ Kũnongwa ye umũlungũ átalile kutubhiishila ulubhaatikho ulwinza nhaani kũnongwa yitũ, inga itwe peeka nabho tũposheele zye álajile kuutupa.

12

Kũlandata ishikholanyo sha Yeesu

¹ Kũnongwa ye itwe tuseteliilwe ni mpuga impiti iya bhakeeti, twefwe khokhonti khe khakutudinda, ni mbiibhi zye zikutulema nalubhilo. Khabhili tũdaaje kũshimbila mu mafuuyano ge gali pilongolela yitũ kwi dala ilya kujimbiilila, ² kumo tũmwenyaaje uYeesu we akutulongola tũmwitisho umũlungũ. Khabhili we akuutupa umwoyo kũmaliilizya ganaago amafuuyano aga lubhilo. Uweene

ájimbiliye uwufwe pa shikhobhenhanyo sita kusaajila insoni kunongwa iya luseshelo lwe lukhamugulilaga. Akhikhala ku nyoobhe iya kundiilo kwi tengu ilya shimwene ilya Mulungu, apa lushindikho ulupiti nhaani.

³ Ishi tejeelezyi she uYeesu akhaniilwe na bhabhomba mbiibhi, ileelo uweene akhajimbiilila zyonti. Pe shiniisho, mutakhalite na kukhatampa. ⁴ Poope she mukufuuyana ni nsungakho izyi mbiibhi, mutafishiiye kulwa ibho ilya kwita ibhanda lyinyu. ⁵ Bhuli, amazwi gaala ge uMulungu alonjile kuti imwe mwe bhaana bhaakwe, inga abhajinjizye umwoyo, mugiwilwe? Kunongwa ye uMulungu alonjile atili,

“Mwana waani, uMwene inga aakupa ulufundo
kukulongola ku winza,
utalulolaje kuti lunsu.

Khabhili inga akukusokha, utakhakhatampe umwoyo.

⁶ Kunongwa ye uMulungu akumusokha umuntu we amuganile.

Khabhili akuumupa ulufundo umuntu we amaposheleeye kubha mwana waakwe.”*

⁷ Pe mujimbililaje kufundwa, kunongwa ye uMulungu akubhabhombela imwe anza bhaana bhaakwe. Kunongwa ye atalipo umwana we atakufundwa nu yise waakwe. ⁸ uMulungu akubhapa abhaana bhaakwe ulufundo. Pe

* **12:6** 12:5-6 Bhaazya Vwilikho 3:11-12.

shiniisho inga uMulungu atakubhapa ulufundo, mumanye kuti mwe bhaana abhasoosi, te mwe bhaana bhaakwe. ⁹ Peeka na ganaago, twámile na bhayise bhiitu abha mu nsi umu bhe bhátupiiye ulufundo, niitwe tukhabhatinikhaga. Pe tukwanziwa tumutinikhaje nhaani uTaata uwa mooyo giitu, inga tubhe twe bhapuma. ¹⁰ Kunongwa ye poope abhayise bhiitu mu nsi umu bhatupiiye ulufundo ku khabhalilo khashe kulandatana na she bhakulola yikhondeeye. Ieelo uMulungu akutupanga ulufundo kutwavwa, inga niitwe tubhe nu wufinjile waakwe. ¹¹ Lutaliipo ulufundo lwe lukuseshelwa we lukubhombekha, lyoli lukuswimiilizya. Ieelo bhaala bhe bhapewilwe ulufundo na kulwimvwa, lukubhamanyizya kubha na wiikhalo uwa wugolosu nu wutengaanu.

¹² Pe shiniisho mugomwaje inyoobhe zyinyu zye zitelebhaaye, ni visugamo vwinyu vwe vitelebhaaye.† ¹³ Mulemaje amadala ge magolosu, inga bhaala bhe bhalemaaye ivinama vwabho bhatakhakuntile bhagwe, lyoli bhapone.‡

Mulemaje insoshi

¹⁴ Bhanholo bhaani, yikungulaji mwikhalaje ku wutengaanu na bhantu bhonti, kabhili mwikhalaje uwiikhalo uwa wufinjile. Kunongwa ye ataliipo we angakhola kumulola uMulungu sita kwikhala uwiikhalo anza wunuwu. ¹⁵ Mubhanje amiiso, kuti atakhabhe umuntu

† **12:12** 12:12 Bhaazya Yeesaya 35:3. ‡ **12:13** 12:13 Bhaazya Vwilikho 4:26.

wowonti uwa kupootwa kuwaaga uwiila wa Mulungu. Mwenyaaaje nhaani inga kutakhabhe na bhantu bhe bhali ngati matandalazi amakhali aga shimela pakaasi yiinyu. Kunongwa ye abhantu anza bhanaabho bhangaleeta umuyubhano na kwambushizya abhantu abhanji. ¹⁶ Khabhili mubhanje amiiso kutakhabhe na bhabhembu awe abhantu bhe bhakumukhaana uMulungu anzu Esau. Uweene akaziizye uwugaali waakwe ku shaakulya isha khabhalilo kheeka. ¹⁷ Niimwe mumanyile she zyámile, kuti pilongolela wope akhazaga uwugaali uwa kusaywa, ileelo uyise akhakhaana. Pe uEsau akhalila amansozi kuti uyise waakwe amusaye, ileelo atakhabha na khabhalilo akha kulaata she poope áyanzile ku mansozi.

¹⁸ Imwe mutinzile kushilila ku khantu khe khakulemekha anza Bhaisilaeli she bháfishiye kwi gamba ilya Sinaayi. Igamba liila likhaakhaga imbiitu izya mwoto, lyágubishiliilwe na khiisi akhapiti, ni mpepu impiti yikhavugulaga. ¹⁹ Khabhili pi gamba liila likhavwinhaga izi ilyi kakaavu ni ntalalukho iyi mvula. ABhaisilaeli we bhalyimvwa izi liniilyo ilya Mulungu lye lyámile lya kwogofwa, bhakhamulaabha kuti atalonje nabho winza amazwi agamwabho. ²⁰ Kunongwa ye bhápotiilwe kujimbiilila insoshi zye uMulungu ábhalajiziizye kuti, “Pope ishikhanu inga shapalamansya igamba liniilyo, shikhomwaje na mawe.”§ ²¹ Ziila zye bházilolile paala

zikhogofwaga nhaani, poope uMoose wuuyo akhati, “Noogopa, khabhili inkuyinga ku lyoga.”*

²² Heelo imwe mufishile kwi gamba ilya Sayuuni, ku nhaaya ya Mulungu we mwumi. Mufishile ku Yelusaleemu iya kumwanya, kwe amaelufu na maelufu aga bhakhabhizya bhakushimwa. ²³ Heelo imwe mufishile ku lubhangaano ulwa shibhanza isha bhapaapilwa abha kwanda abha Mulungu, bhe amataawa gaabho gasimbiilwe kumwanya. Mufishile kwa Mulungu we Mulonji wa bhantu bhonti, kwe kuli amoooyo ga bhantu bhe bhagolosu bhe bhabhishiilwe kubha bhafinjile. ²⁴ Mufishile kwa Yeesu, umwimvwanayi uwa lufingo ulupwa, we akwimvwananya abhantu na Mulungu. Ibhanda lyakwe lye lyitishile kutuuyila imbiibhi, lye likulonga nitwe amazwi aminza kushila ibhanda ilya Abeli lye likhamulandzuya uKaayini.

²⁵ Mubhe amiiso, mutakhakhaane kumutejeelezya uyo we akulonga nimwe. Bhaala bhe bhakhaanile kumutejeelezya uMoose we abhasoshile mu nsi umu, bhataselenjile ulufundo. Nitwe te tukhaakhole kuselenga ulufundo inga twakhaana kumutejeelezya ula we akutusokha kufuma kumwanya. ²⁶ Akhabhalilo khaala, uMulungu we alonga, izi lyakwe lyayinzanyiinye insi. Heelo ishi atulajile kuti, “Inhayiyinzanya winza insi kheeka, khabhili te nsi nyeene, lyoli na kumwanya.”† ²⁷ Izwi liniili “winza” likulolesya

* **12:21** 12:21 Bhaazya Nkumbushizyo 9:19. † **12:26** 12:26 Bhaazya Hagaayi 2:6.

kuti ivintu vwonti vwe vwápelilwe mu nsi umu vikhayiyinzanywa na kuyazwa, inga visyale viila vwe vitangayinzanywa. ²⁸ Pe shiniisho, tumusalifwaje uMulungu, kunongwa ye tukuposheela uwumwene we wutangayinzanywa. Tumusalifwaje na kumupuuta uMulungu kwi dala lye likumukhondezya, ku wutonsu nu lushindikho. ²⁹ Kunongwa ye uMulungu wiitu mwoto umukhali we wakulungulizya!

13

She yikwanziwa kumukhondezya uMulungu

¹ Mujendeelele kuganana anza bhalandati bha Yeesu she bhakwanziwa kubha. ² Khabhili mutakhaaleshe kubhaposheela abhajeni, kunongwa ye bhamu bhe bhábhombile shiniisho, bhábhaposheleeye abhakhahizya sita kumanya. ³ Mubhakumbukhaje abhantu bhe bhali mwi jeela, mubhe ngati niimwe mukungiilwe nabho. Mubhakumbukhaje bhaala bhe bhakuyimba ngati niimwe mukuyimba peeka nabho.

⁴ Kwegana kakhondeeye ulushindikho ku bhantu bhonti, umulume nu mushi bhabhe bhasunde mu weegano waabho. uMulungu akhayibhalonga abhabhembu na bhalondo. ⁵ Mutabhanje ni njendo izya kugana inhela, lyoli mukhobhokhaje na viila vwe muli navwo. Kunongwa ye uMulungu átili, “Te inkuleshe

naalumo, khabhili te inkutaaje.”* 6 Ye nongwa tungakhola kulonga kuti,
 “Mwene we akunaavwa,
 intangoogopa khokhonti.

Umuntu angambomba lyoni?”†

7 Mubhakumbukhaje bhaala bhe bhakhalongozyaga, bhe bhábhahuziize izwi lya Múlungu. Mwenyaaje akhinza zye zyáfumiiye mu wiikhalo waabho, niimwe mwenyezyaje ulwitikho lwabho. 8 UYeesu Kilisiti atakugalanhana, we wu wuuyo mazubha, umusanyuunú, na wiila. 9 Bhanholo bhaani, matakhakhopelwe ni manyizyo izinji izya shijeni izya shikholo shoshonti. Uwiila wa Múlungu we wakugomwa amooyo giitu, te ndajilo zye zikukhaana ivwakulya. Indajilo ziniizyo izya vwakulya zitakhabhavwaga ngakheeka bhe bhakhazilandataga.

10 Itwe tuli ni shigemo she poope abhapuutili bhe bhakumubhombela uMúlungu mu sheegwi apafinjile, bhatakwitishilwa kulya imfinjile izya vintu vwe vwábhishiilwe pamwanya pa shigemo shiila. 11 Kulandatana ni ndajizyo zya Moose, umupuutili umupiti akutwala ibhanda ilya vikhanu aPafinjile Nhaani, yibhe mfinjile iya kutuuyilwa abhantu imbiibhi. Heelo amabhili gonti aga vikhanu viniivwo gakhapembwaga na kulungulila kunzi iyi sheegwi. 12 Ye nongwa uYeesu wope ayimbile na kugogwa kunzi iyi nhaaya, inga abhazelufwe abhantu bhaakwe

* 13:5 13:5 Bhaazyá Nkumbushizyo 31:6, 8. † 13:6 13:6 Bhaazyá Zabuuli 118:6.

imbiibhi kwi bhanda lyakwe wuuyoy. ¹³ Pe shiniisho, niitwe tumubhalile kunukwo kunzi iyi nhaaya, twitise kushoolanywa anzu weene she asholanyiinywe. ¹⁴ Kunongwa ye mu nsi umu tutali ni nhaaya ye yikudiila, ileelo tukuyanza inhaaya iya kumwanya ye yikwinza.

¹⁵ Ishi tumupaalaje uMlungu na kuvwinya uwumwamu waakwe akhabhalilo khonti. Kunongwa ye liniilyo lye lidala iya kumufumwizya imfinjile zyitu kushilila kwa Yeesu. ¹⁶ Mutakhiwe kubhomba inyinza na kwavwana, kunongwa ye kubhomba shiniisho mfinjile ye yikumukhondezya uMlungu.

¹⁷ Mubhatinikhaje abhalongozi bhiinyu na kulema indajilo zyaaho. Kunongwa ye abheene bhakuyifumwa kusunga amooyo giinyu, bhoope bhakhayifumwa uwukeeti uwi mbombo yaabho kwa Mlungu. Mubhatinikhaje inga bhabhombaje imbombo zyaaho ku luseshelo. Kwe kuti inga mwalekha kubhatinikha bhatibhombaje imbombo yaabho ku wuswimiilizu. Imbombo yaabho yiniyo yitangabhaavwa naakhamu imwe inga bhakubhomba ku wuswimiilizu. ¹⁸ Mutuputilaje itwe. Tuli nu lusimishizyo kuti amooyo giitu gatakutulonga, khabhili tukwanza lyolyonti lye twabhomba libhe lya wugolosu nu lushindikho. ¹⁹ Inkubhalamba nhaani kuti mumputilaje inga uMlungu angalusye kukwinyu nalubhilo.

Impuuto ni ndamukho

²⁰⁻²¹ Ishi uMlungu uwa wutengaanu we amuzusiizye uMwene wiitu uYeesu,

abhalingaanye imwe ku lyolyonti lye lyanza inga mubhombaje ishigane shaakwe. Khabhili aabhape amakha aga kubhomba zye zikumukhondezya kwi dala ilya kubhakhomaanya imwe nu Yeesu Kilisiti. Uweene we Mudiimi uMupiti uwi ngoole, kunongwa ye ayifumwizye kubha mfinjile, akhafwa inga alusimishizye lanuulwo ulufingo lwe lutali nu wamalilishilo kwi bhanda lyakwe. UMulungu, uTaata wiitu, ayimishilwaje, wiila na wiila! Zibhe shiniisho.

²² Bhanholo bhaani mu lwitikho, inkubha-sundiilila kuti mugalemeelele nhaani ganaaga amazwi mashe aga kujinjizya umwoyo ge imbasimbiiye mwi kalaata ili. ²³ Inkwanza mamanye kuti unholo wiitu mu lwitikho uTi-imoti asatuliilwe mwi jeela. Pe inga ayinza nalubhilo ipa pe indi, inhayinza peeka nawo kukwinyu.

²⁴ Mundamushile abhalongozi bhiinyu bhonti na bhafinjile bhonti bhe bhali kunuukwo. Abhanholo bhitu abha mu nsi iya Itaaliya bhakubhalamukha.

²⁵ Uwiila wa Mulungu wubhe peeka niimwe mwenti.

**ULufingo uLupwa ku ndongo iya Shimalila
Malila: ULufingo uLupwa ku ndongo iya Shimalila
(New Testament+)**

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3aa8e7a3-f258-5182-ab3f-fbc6f725bb06